

A.E.W.S. BOS-HERMELINK

ALNS IS N WOONDER



ALNS IS N WOONDER

A.E.W.S. BOS-HERMELINK

Illustratie omslag:

BOERDERIEJ MET TOPGEVVEL; N.O. TWENTE

*G. Bos. Twente
Jan 87*

Typewerk : Dany Filippelli
Illustraties: Fons van Schoot
Lay-out : Bert Wolbert
(c) : Uitgave in eigen beheer

ALNS IS N WOONDER

A.E.W.S. BOS-HERMELINK

OLDENZAAL MEI 1987.

2^e druk okt. 1987

A'j wilt dat de Twentse Sproak
d'r vuur later mot blievn
verget dan nich het oaver te dreagn
duur t te sprekn en te schrievn

A.E.W.S. BOS-HERMELINK



- BOERDERIEJ IN N SNEE

INHOALTS-OAVERZICHT

boerderiej inn snee (ill.)	4
inhalts-oaverzicht	5
alns is n woonder	7
dwerrelende weurde	8
n zunnig boerderiejkn	9
zee zag t nich meer zitn	10
milieu bedearf	11
veur t eerst noa de keark	12
wearkloos	13
zommerstilte	14
n kroeznboam	15
boerderiej in de buurtschop Voalt (ill.)	16
nacht	17
discriminatie	18
nen moorgn	19
keender eugkes	20
wolkn	21
luk meer vreendelikheid	22
leavend dood	23
wietvot en dichtbiej	24
oaldn toarn	25
klooster an de Gasthoesstroat (ill.)	26
zoern reagn	27
heimwee	28
echtscheiding	29
nachtegaal	30
gewoon verdan	31
n baankgeheim	32
biester weer	33
bloomn locht	34
nen gevangene	35
erve Haambearg - Deaneakaamp (ill.)	36
hearfst	37
n grommelschoer	38
zienn pelgrimstocht hoast volbracht	39
de weenterdag	40

t geheim van de zee	41
verkeersveiligheid	42
mais, nen greunn engel	43
nen kraankn	44
veuroavond	45
t hoes van Horsthoes - Oldnzel (ill.)	46
de pöppel	47
nen zwearver	48
de schepping	49
eenzame herte	50
koekoek	51
meude oagn	52
ne roos	53
t geweetn	54
de muske	55
huuske in n Engelsn tuin - Oldnzel (ill.)	56
oavendrood	57
noordzee	58
t heelal	59
woar blif de weend	60
n eandstreep	61

ALNS IS N WOONDER

Te kiek'n stun ik
noa de blauwe locht
de duunn en reviern
de zun zee en t water
bearge en de buske
en noa t laand

wi'k wieder noe
alle weagn bewaandeln
vroag ik wal um
n goodn Leider
dee mij toostek
Ziene onzichtbare haand

DWERRELENDE WEURDE

Ik schrief de weurde oaver t plezeer
mear ok oaver mien stil verdreet
nich dee weurde deep oet mien hert
dee vertrouw ik t papier nich too, zo'j zeet

Ok schrief ik ze op van t kleane keend
dee zeent zo kort en mangs zo zacht
ze ritselt net as jonge pöppelbleadkes
woarin as t weait in n zoeln veurjoars nacht

Dan vang ik de weurde op van alle meanske
van de eenzame stillen en alle oalde leu
dee vaak nog geern luk kuiern wilt
want t proatn bint ze nich meu

N ZUNNIG BOERDERIEJKN

Wat lig t boerderiejkn
mooi doar veur n mös
Op zied van t hoes stoat eekn
veur t hoes zee'j t greune grös
Het peerd lig met de beeste
heel vreadig doar te zunn
De hoonder schrobt in de buske
mear hebt er nich völ vunn
De weend kan ear nich pahn
met nog zonn hardn poes
Zee veult zich doar veilig
doar um en bie j t hoes

n Boer met ziene vrouw
zitt te röstn op ne baank
zee leaft doar zo gelukkig
hebt t boerderiejkn nog Goddaank

ZEE ZAG T NICH MEER ZITN

Wanneer t in n oavond â duuster was,
 en zee zat doar dan h   l alleen,
 tuurdn ze uurn noa t behang...
 of ze proatn doar met nen steen.

Alns kwam dan op ear of
 Ze sjouwn mangs hen en weer,
 angstig keek ze dan um zich too
 wat deu ear h  rtte toch zeer...

Lang h  l ze dat nich meer oet,
 zee zat alleen doar met ear lot,
 meer...d  n veulde ze opees toch weer
 de anwezigheid van earn God...

Earn Redder kwam nog n  t op tied,
 zee kreeg noe weer niejn mood,
 hoo was t aandars wa met eer goan?
 misschien was zee d  n w   dood...

MILIEU BEDEARF

Woar vroger de Meibleumkes bleuidn
ligt noe stukskes plastik op t grös
lig er luk öllie op t water
dat stroomt in de bekke deurn mös

De braandnettel doar an de kaante
dee hoalt earn kop ok a daal
mear van de leus dee der stundn
stoat d'r alleen nog de stengel, mear kaal

Peerdebloomn stoat er nog genug doar
doar is dan nog niks met gebeurd
dit steet in de beuke noe beschrevn
want um dee hef gin meanske nog treurd

Noe is t nog nich te laat leu
now kön wiej der nog wat an doon
Wel helpt er met n pröttel opruumn
dan heb wiej oons Twente weer schoon

VEUR T EERST NOA DE KEARK

Veur t eerst moch t kleane wichkn
 met ear Moder noar de keark
 Wat t doar almoal kreeg te zeen
 vun t wichkn heelmoal gin weark

t Stun op de kneebaank luk te kiekn
 met t duumken in earn moond
 Wat t doar almoal kreeg te zeen
 op dee plaat maakten ze t vö! te boont

t Zag doar ne grote schilderiej
 met n kruus en doarop oons Leewn Heer
 gauw trök t duumkn oett n moond
 want de soldoatn deedn Hem ok zeer

Angstig keek t too um zik hen
 keek heel de keark ees roond
 zöt hier noe gin èënn man
 dat oons Leewn Heer lig op de grond

Mama reupt t har, ik wil hier vot
 schudde t köpkn drok hen en weer
 ik wil hier vot, ik wil noar hoes
 hier helpt gin èën oons Leewn Heer

WEARKLOOS

Wearkloos steet hee suf te kiek
den wearkloosn man
Wearkn kon hee aait ja onwies har
Wat slim dat hee t nich meer kan
Nooit eerder was hee zoonder weark
en t is veur hem toch wat
ha'k noe mear n paar daage wat te doon
hier of doar in oonze stad

Zo hol ik dat nich vol
ik wor nog stapelgek
heel völ wekke geet t noe a zo
Too loatt miej nich in n stek
Zo vroagt er völ hier in t laand
k'wol wiej konn er wat an doon
dan deudn wiej aln oonze plicht
as n metleavend meanske heel gewoon

ZOMMERSTILTE

De wolkn hangt er stil
t beloaft nen dag van dreume
De wolkn hangt er stil
boavn hoge beume

De huuskes ligt er stil
met too de vèèensterloekn
De huuskes ligt er stil
achter dichte stroekn

De weage wocht er stil
met n lange stoond van weansche
De weage wocht er stil
zoonder ennig meansche

N KROEZNBOAM

n Oaldn Kroeznboam steet in n Fleringer es
 hee is kraank, luk troag, das nich zo bes
 n Boamchirurg hef er van alsn an prebeerd
 d'r dikke pinn inhouwn en zo opereerd
 Noe kan hee doar wal n zetkn met verdan
 mear van al t getimmer wö'j nich better van
 Um n oaldn boam is altied wat te doon
 oonzn eek is doar a heelmoal an gewoon
 Keender plukt er bleumkes, legt ze op t altoar
 vangt dan met mekaar um n eek weer doar
 al hef n Kroezn boam zo a lange joarn stoan
 veur hem is t ok eenmaal ofloopn is t doan
 vaalt n boam dan daal, tegn de zwarte groond
 beenk dan nog hier en ok nog good gezoond
 hop ik t nog met te maakn, en nich versletn
 dat ze doar op dee stie n joonk beumkn zölt zetn



- BOERDERIEJ IN BUURTSCHOP VOALT

NACHT

De moan lacht de stearne too
doar boavn in de locht
de vöggel holt eare vlöggel stil
dee ze oaverdag broektn veur de vlocht

Zacht weait er nog ne zoele weend
soest er zacht oaver bearg en dal
n meanske slöp mear röstig deur
ik deank dat d'r wal één dreumn zal

Zo geet t deur tot t eande koomp
en ok ik mien slotstuk speur
krieg wiej oonze eeuwge röst
doar zoargt wal oonzn Herder véur

DISCRIMINATIE

Völ meanske
hebt weanske
groot en kleen
een te wean
blaank en zwart
weans van t hart
gin gevechtn
börgerrechtn
mekaar verstoan
saamn goan
doo het dan
noe t nog kan
gebroek verstaand
gew de haand
gin gezeur
oaver kleur

Doarum blaank en zwart
Nooit meer apart!

NEN MOORGN

Vroo was ik den moorgn op
den dauw lag nog op t grös
en ik leup doar heel alleen
t was wa koald undat t vrös

Mear ik leup deur, k was gezoond
k har vroger zo vaak a heurd
n Moornstoond har goald in n moond
misschien dat t vandaag wal gebeurd

De zun zag ik al mear hoger goan
met nen mooin goaldn raand
too, keek ik efkes um miej hen
wat mooi was toch mien Twentelaand

Noe ik dit alns hier zo zag
was k opees nich meer zo koald
t beloavn ja ok nen mooin dag
en ik dachn nich meer an t goald

KEENDER EUGKES

De eugkes van alle keender
a zeent ze blaank of zwart
den Schepper hef toobedacht
stroalt almoal t zölfde
As ze plezeer hebt en dan lacht

Keendereugkes woarvan vreade oetgeet
vraagt altied um vreade, nich um t verdreet

WOLKN

Kiek ik noa boavn zee'k ze stoevn
net of ze doar vot zeent op vlocht
of ze mekaar of wilt troevn
um t eerst te wean in de locht
de baas te spöln oonder de zun
dee t met de moan a lang van ear wun
Vreadig könt ze ok lign as schöape
dee oetröst en dan weer trekt wieder
zich dan weer riegt al te hoape
dat eare meuheed nich wöd lieder
wolkn in de locht, ...
ik zee oew wa geerne
iej heurt bie j de zun, ...
de moan en de stearne

LUK MEER VREENDELIKHEED

Luk meer vreendelikheed op disse eard
och, dat was miej heel wat weard
Weans de means toch n goodn dag
met, as t kan nen knik en nen lach

As toch efn aandere kan
loop dan nich zo stoer verdan
nemt oew dat vandaag ees veur
iej sliet d'r ja gin spierkn deur

Gun alle leu es nen goodn morgn
al zit iej zölf met n kop vol zoargn
as iedereen ziene stoerheed oaverwun
scheen er veur völ leu ne woarme zun

LEAVEND DOOD

Völ meansche hier op eard
zeent bie j t leavn noa dood
t hef veur ear gen wearde
ze zint van n andersoort
zee leaft dood hier voort

Zee gewt niks um t schoone
roekt nooit ees bloomlocht
zee heurt bie j dee gewoonn
dee t nooit ees luk bekoort
zo leaft ze dood hier voort

Eenzaam goat ze wieder
gewt niks um ear bestoan
leaft doelloos zonder Herder
ear bestoan wat nooit bestun
wat bie j t leavn de dood a vun

WIETVOT EN DICHTBIEJ

In het heelal
tuurde ik doar
mear wör ofremt
deur n gedien van mist
mienn geest was
luk verzwakt
mear steark genug
um n mist te brekn
Zacht zung ik veur hen
in disse ruimte
(Ik nader mien God tot Oew)


OALDN TOARN

Wied in n umtrek kö'j um zeen
oonzn griezn oaldn toarn
hee steet doar stewwig op de been
a lange lange joarn

Ziene klaankn heur iej wied
met t plezeer en met t verdreet
t uurweark hoalt zich an de tied
um t halfuur spölt t zien leed

De weend poest um ziene hoed
en t sniejt um in n nek
hoo hoals doe toarn dat toch oet
stees altied doar op n trek

Griezn toarn bliew mear stoan
Kiek hoog mear op oons neer
doe hes t veur oons aln doan
beschearm t hoes doar aait mer weer



- KLOOSTER AN DE GASTHOESSTROAT; OLDNZEL

ZOERN REAGN

Leu zit nich aait te prakkezearn,
kiek ees um oew too noa t moois op aerd.
bliew nich deurdeankn an n duustern morgn
de zun koomp wa weer en da's wat weard.

maak van elkn dag luk moois
a is er ok wa mangs nen duustern dag.
nemt het dan ok nich zo zwoar
begin noe elkn morgn ees met nen lach.

want van t zeurn, krieg wie zoern reagn
dee dröppelt dan laankzaam op oons daal.
dan geet het oons net de beume
wör wiej op doer ok kaal.

HEIMWEE

Wanneer iej ees wietvot in n vrömdn zint
en luk wied van t eagn hoes of zint
wied van t mooie Tukkerlaand
dan veul iej dat er iets oew trekt
ne kleur ne klaank t verlangen wekt
noa t mooie Twentelaand.

t Wöd ne grote verbliedenis
te zeen hoo mooi oons Twente is
van buske, bos en t heedelaand
Ginne sproake in d'wearld zeuter klinkt
nog tot de zeele deeper dringt
Dan dee van t Twentelaand

En as iej in nen goaldn dag
weer heurt n oaldn toarn slag
doar as nen duusteren ofgezaant
dan veul iej woar aj ok zwearvn zölt dan
dat nooit in oons ok stearvn kan
dat leeve Twentelaand

ECHTSCHIEDING

Bouwt gin geluk op n aander zien verdreet
leu ik weet dat dāt nooit geet
Bezeent oew veur da'j d'r an begeent
de dupe wördt aait t onschuldig keend
Dee stumpers könt der niks an doon
zölt de leefde misn heel gewoon
zee roopt um Vader, Moder ieder keer
komt gauw weerum allebeade weer
Deankt good noa, veur da'j vot zölt goan
en oew keender huulnd doar loatt stoan
Dit geald veur de man en veur de vrouw
t blif nich oet, iej kriegt berouw

NACHTEGAAL

Nachtegaal, nachtegaal
wat he'k lang op diej wocht
biej heel völ buske bleef ik stoan
oaveral he'k diej zocht

Nachtegaal, nachtegaal
opeens heurdn ik dien leed
has miej doadelik in de macht
vot was mien stil verdreet

Nachtegaal, nachtegaal
nooit verveelt miej dien gezang
a zungs n heeln nach ok deur
of doern t nog ees zo lang

Nachtegaal, nachtegaal
bis n zanger van n nacht
allennig deur dien mooie leed
maaks doe dat n means weer lacht

GEWOON VERDAN

Wat zin wiej vaak domme leu
t is net of d'r mangs luk ontbrek
misschien zeent oonze hersns meu
löt t verstaand oons noe in n stek
deank ik vaak: och gewoon verdan
t löp aait toch wal weer los
de rem d'r of as t efn kan
wat dös, wat zas, wat wös...
t Is toch almoal a regeld hier
wiej hebt er ja niks an te koap
en het helpt oons ok gin zier
loa'w t mooi hoaln al te hoap

n BAANKGEHEIM

Wat is er wat op ne baank besprökn
 gin meanske leut zich doar steurn
 doar zatn ze dan in boksen of rökkn
 er was ok gin means dee ear kan heurn

Eare stille getuugn warn vöggel in buske
 dee steurdn zich nich an al dat geproat
 dat was nen geeteling en ok wal ne muske
 dee zatn doar te kiekn op nen tak of droad

Zo geet t altied mear deur hier in t leavn
 dat ze almoal n aarm um mekaar zölt sloan
 verknooit nich dee tied want t is mer eavn
 t geet aait zo deur t zal wal blievn bestoan

BIESTER WEER

Weend as boestert deur de locht
drait t heel vaak oet op vocht
as doe zo roeschet zo um mie
röps wakker in miej poëzie
met diej zol ik wiln vluchtn
vot, oet disse eardse zuchtn
oaver bearge, zeeën, woeste golvn
en oaveral zo'k diej wa volgn
a'k eenmaal met diej met zol goan
wi'k ok n stearkstn storm deurstoan
soez wiej dan saamn deur t heelal
weet ik nog nich woa k bliewn zal

BLOOMNLOCHT

Ik hol van alle bloomn
joa, van elk soort zwoar of zeut
oaveral snoew ik wa luk van op
wat er mear steet veur miene veut

Ik nem van ne roos, of n peerdebloom,
dalia, margriet en Oostindise kers
ik roek doar ja ok van alns wat
woar ik wat roek of langs zin wes

n Heeln natuur vin ik toch mooi
ok wa de vealdbloomn, in t bizoonder
en deank ik an n Maker van dit alns
ik daank oew veur dit machtig groot woonder

Wiej goat er almoal te gauw an veurbiej
da's elk means hoast a hêél gewoon
k zol zegn neamt d'r nen nös vol van met
kö'j er aait nog an t snoevend wat met doon

NEN GEVANGENE

In ziene cel löp ne gevangene
 tuske de hoge, grouwe muurn
 Hee krabt er s oavends wat streepkes op
 en tealt er de daagn en de uurn

Vaak deankt hee an ziene vrouw en keend
 vrög zich of: woarum he'k dit toch doan
 woarom hek nich good noadacht in dee tied
 hoo koonk miej toch zo loatn goan

Dreuvig sjökt hee noe deur ziene cel
 mangs röp hé: Vader, Moder, vrouw
 t wöd weer nen nacht van wakker lign
 en an zien hert knaagt t berouw

Toch is hee doar ja nooit alleen
 Een kan er deur de dikste deurn
 en koomp aaltied bie j n means in nood
 as dee, ees noar Hem wol heurn

Geleuw mear in n Schepper van n means
 vool de haande ees en kiek noa boavn
 Hee gef doar aait weer troost an ieder
 Da's zeker en dat kan k oew in t veurn a beloavn



- EARF VAN HAAMBEARG; DEANEKAAMP

HEARFST

De blaar dee komt noe op mij of
met nervn fien, met nervn grof
ze griept nog eare leste kaans
dor dwerrelend nog n roondedaans
dan vaalt ze zacht op earde neer
nog n kortn tied en ze zeent nich meer

N GROMMELSCHOER

Mangs op nen heetn zommerdag
 hef zo elk means zien beklag
 vaak is t ok nich van langn doer
 of doar koomp wal n grommelschoer

Ik zee doar a ne grieze locht
 de zwaluw hef ne leage vlocht
 de locht wördt duuster, de locht wöd gel
 t wördt zo duuster as de hel

Doar zee ik al t eerste lechtn
 n bliksum geet met n doonder vechtn
 van wiedn kö'j t a grommeln heurn
 t is net of n meanske t veult in t veurn

de buui trekt oaver, wiej er oonder
 slag op slag heur lej dan t gedoonder
 dan vroag ik zacht beschearm miej Heer
 spoar miej toch ok weer disse keer

Goddaank de weend geet n kop opstekn
 en dan mot de buui wa vertrekn....
 t Grommeln is doan, mear weej wat t is?
 aait noa zonne buui is't zo lekker fris

ZIENN PELGRIMSTOCHT HOAST VOLBRACHT

An de kaant steet nen griezn man
en röst wat op zienn stok
Hoast heffe zienn pelgrimstocht volbracht
Zien beus hangt a wat rok

Hee is noe krom van t völle weark
datte joarn laank hef doan
Hee döt noe luk kalmer an
mot vaak ok zitn goan

Mear nich heel lang, doar geet è weer
en sjokt noa ziene iemn
mer noa n paar tred, wil t nich meer
ziene böst vaank an te giemn

Hee is n tevreadn oaldn man
vrea hef e ok met zien lot
Hee is op alns veurbereid
ok asse ees stearvn mot

DE WEENTERDAG

Het weentert har, wat is t koald
 op de beume blif n giezel hangn
 dee weend poest um miene hoed
 noa t veurjoar goa'k verlangn

Mienn oadum dee hoast ofsnedn wöd
 is ja zowat bevreurn
 as dat zo deurgeet, hol k t nich vol
 dan beenk veurgood verleurn

Ik zee nen pony in n snee loopn
 dee schof as hee kan n snee weg
 dan kik hee miej zo döllig an
 of hee deankt, ik kom toch oet Ruslaand zeg

Nen geeteling dee bit de muske of
 en vecht tegn zienn hongerdood
 n knien kik met zienn kop oet t hol
 den veult zich doar nog good

Zo loop ik deur, en gew nich op
 deur dee keulte, veutke veur veutke
 al ist ok nen hardn stried
 ik legge veur dee keulte nich t leutke

T GEHEIM VAN DE ZEE

Wanneer ik ees waandel langs t straand
en zee doar dee woeste golvn
koomp an t deankn mien verstaand
en wör ik oonder vroagn bedolvn

Meeuwn zee'k vleege in de blauwe locht
tuske de hoge grieze rotsn
preuw ik in de weend t zoalte vocht
k heur roeschend doar de golvn klotsn

Dan vroag ik mij of, wee was toch dee means
wel har toch dee macht in Ziene vingers
veur Hem wil ik maakn, is mienn weans
oet dankbaar-heed völ goaldene slingers

VERKEERSVEILIGHEED

In disn jachtign tied
blief ik toch efn stoan
ik heur de ambulance leuin
um wis weer noa n ongeval te goan

Dat har toch nich hoovn gebeurn
ik wus veuroet wa t gung nich good
gen een gaf op n dreai richting an
t is net of ze wilt earn dood

Har hee ziene haand oetstökn
dat aait mot in t verkeer (good verstoan)
dan hoof lej nich in disse waag te lign
en har dan ongekneusd noa hoes könn goan

MAIS NEN GREUNN ENGEL

n Mais steet noe zo mooi op t laand
mear wocht op de zun en n reagn
zo krig ze weer eare goaldn keurn
veur t vee is t in t weenter nen zeagn

Doar stoat ze dan dee greune juffers
op rieg in n es, mear wal luk stief
blaar beschearmt de goaldn keurnkes
dee wat klungelig hangt um t lief

Mear eenmaal koomp d'r ne sniemaschien
dee knestert ze op t laand ja doar
dan wördt ze noar n pershoap bracht
en niejn wördt weer zeait, t kommend joar

NEN KRAANKN

Wat he'k vö1 te verwearkn
doar dag en nacht in t ber
hoo ik miej rol of drea1
ik veul iedere kraanke ster.

Ondreagelik is ja dee pien
och kwam er toch mer n eand
mear ik weet t noe eenmoal
den dag is nog onbekeand.

De weend en ok n duuster
dee maakt miej ok zo bang
Heer verlos miej haal mie toch
t doert miej hoast te lang.

Miene kamerdeur steet doar ja
n heeln dag op ne kier
en in miene hoge koorts
heur ik d engeln zingn hier.

k Was aait ja good gezoond
en wearkn kon ik wa good
Verlosser, as t mien tied is
dân wi'k wa geerne dood.

VEUROAVEND

Ear de zun zakt
döt ze efn gloarn
t kruus en t dak
van n hoogn toarn

Op n kruusaarm
zatn twee kreain
röstig te kiekn
noa de leu ear kleain

t Grote maarkt lig
geheel verloatn
leeg gin leavn
in alle stroatn

De klökke klaagn
too de zun gung daaln
en de zwarte kreain
noa d'galmgaatn dwaaln



- HORSTHOES AN DE MAARKT; OLDNZEL

DE POPPEL

De meest hier besprökken beume
neumt ze in t Hollaands populier
eare bleadkes roeschet dag en nacht
in t Twents het ze noe pöppel hier

Ze stoat in n köppelkn
of doar steet, der een alleen
t is net of ze met mekaar stoat te proatn
en könt dat noe eenmoal nich loatn

t Begeent a in t veurjoar tot in n herfst
zee maakt alle joargetiedn hier met
heel zacht roeschet eare jonge bleadkes
net zo earn Maker ze doar hef zet

Roeschet mear deur iej raanke pöppel
aait deur weain da's oew lot
misschien is t wa zo de bedoeling
dat het met de pöppel zo mot

NEN ZWEARVER

Op n hook van n oale schop
 zat nen zwearver op n steen.
 Stil keek e veur zik hen
 hee veuldn zik zo alleen.

n Tuk van zien versletn beus
 buuldn bie j um oarig oet.
 Doar zat luk etn veur um in
 nen knobn, dreuge oale stoet.

Mear doaran har hee noe gin zin,
 hee wol alleen mear röst
 Want hoostn mos hee of en too
 har ok zeerte in ziene böst.

Hee riln oaver ziene hele hoed,
 was koald, proatn in zik zacht.
 Gin stukskn stoet kreeg hee vot
 t wör a duuster, t wör a nacht.

D'r was gin means dee um zag zitn,
 gin een kwam er langs dee um zag.
 Tot n boer um vun n aandrn moorgn
 too hee dood nöast n steen doar lag.

DE SCHEPPING

Zes daage lang hef God er oaver doan
too har oonzn Schepper de wearld der stoan
Hee schepn de deers veur laand en locht
met vlöggel en de veern eare vlocht

elk deer was n woonder
er op of d'r oonder
van nen olifaant tot ne rot
was ne schepping van God

Too kwamn er de beume, de struuke en buske
met völ soortn bloomn er op en d'r tuske
Mear toch har oons Heer nog éénn weans
dat was de schepping van n means
n means met n hert en ne zeel
dat was noe wördn een geheel
as t lichaam eens zol stearvn
de zeel bleef zwearvn

God zag dat t zo good was op d'eard
gaf alns n zeagn, dat was t Hem weard.

EENZAME HERTE

Gin meanske zal t vuur
könn doavn dat ontstoan is
deur leefde voonkn
Eare herte zölt braandn
schrienn en pienn liedn
En as de geschreuide earde
zölt er de kale plekke
doar achter bliewn
mear nooit, nooit
zölt dee woondn heeln ... nooit

KOEKOEK

Koekoek ik heur van wiedn dienn roop
dan weer hier en dan weer doar
hoo ik kiek en hoo ik zeuk
van diej zee'k nooit n spoor

Koekoek doe grieze vöggeldeer
röps ok nich heel geröst
woarum legs dien eikn aait
biej n aander deer in t must

Zeuk diej toch ne goode moat
dan bis nich meer alleen
en kön wiej van t zomer nog
n klean köppelkn zeen

Koekoek gees wa rechtoet
röps ja van tak tot tak
misschien um da's nich zuuver bis
veuls diej nich op dien gemak

Koekoek gefs niks um dien jong
veuls ok nich t gemis
of wees nich as n aander deer
wat echte vöggel-leefde is

MEUDE OAGN

De bloomn sloett van t tuurn zo
met meude oagn eare kelkskes too

Vol Moder-zoarg veult zacht de weend
of zee ne bloom nog waaknd veend

Er stroalt nog lecht de gedienkes deur
één lig d'r op de knee en bidt er veur

Zacht fluustert beume gebedn met
veur wel vergetn ear oavendgebed

Veur wel daagns gewillig zien offer bracht
ééne stearne bleef braandn heeln nacht

De engeln stökn de stearne an
Gods troon stundn te braandn dan

NE ROOS

Doar steet ne roos met n los hert
en vrog um reagn
Eare kleur is verbleekt zeent vaal
deur n stof van de weagn
Zonne kleane bloom in t wiede heelal
Hoo drof ze t woagn
De wolkn dee zo wied vot zint
um hölp te vroagn

t GEWEETN

t Geweetn is n gescheank van God
hef ieder means hier kreagn
Mear alns har n doel met Hem
veur n kort of n heel lang leavn

t Geweetn van n means is roem
en kan as t mot ok rekn
Loa'w good gebroekn oonze rem
zo da'j bie j t roopn van Zien stem
wie j röstig oons könt strekn

DE MUSKE

Doe kleane grieze muske
wat zits te kiekkn op n droad
och, ik weet dat t veurjoar is
doe zogs ne goode moat

Is t veurjoar eenmoal doar
zeent alle vöggel op n biester
nich alleen de muske hier
ok n nachtegaal en n liester

Noe vlögs nog in de buske
doe veuls diej zo alleen
dat zal wa gauw oaver wean
as t vrouwkn he's vundn zö'j zeen

A hes doe ok gin boonte veern
ik vin diej wa mooi zo zeg
hes t met vrouwkn veur mekaar
bouw dan t nuskn in oalde heg

Goa iej dan saamn wonn
zal ik wal veur oew zoargn
k streui dan heel wat krömmelkes
veur oew doar elkkn moorgn



- HUUSKE IN N ENGELSN TUIN; OLDNZEL

OAVENDROOD

Heel vaak heb ik de zun zeen oondergoan
sinds de schepping is dit a zo gebeurd.
Ik bleef dan doar ok aait wa efkes stoan
en heb het dan ok nooit, nooit betreurd.

Langzaam zakn zee er noe daal de zun
Och, wat is den Maker ervan ok groot,
doar-an mos ik too deankn, noe ik doar stun.
Dit wol ik dan noe doar metmaakn tot n dood.

Meu was de zun van ear dageliks weark
Mear ok zee nam er de röst in den nacht.
De moan scheen oaver het dak van de keark
en heel heel völ stearne dee höln de wacht.

Eenmaal keek ik toch effen dan weerum
leup dan langzaam vot, joa heel zacht.
Vreug dan bescherm mij toch meer
Want Iej hebt oaver alns de macht.

NOORDZEE

De Noordzee klotst
ear schoemend sop
al golvnd op t straand
zee gef het nooit of nimmer op
kust dag en nacht oons laand

De Noordzee klotst
umspeult de rots
wiej roekt t greune wier
De zee is oonze zeemanstrots
zee veult zich gelukkig hier

De Noordzee klotst
hef eb en vlood
Deep in de zee hieroonder
leaft deers met koald blood
Is dat gin scheppingswoonder?

t HEELAL

De locht is hoog haank um oons too
net as ne klôk dee eare kuukn beschearmt
t liekt wa net al is zee oons aller Moo
en zich zo oaver de leu hier ontfearmt
Is t dan weer duuster koomp weer n nacht
en umhaank weer n boog doar noe alle leu
de moan hoalt dan de wacht met de stearne
want de locht is t löchtn dan meu.

WOAR BLIF DE WEEND

Weend as weais doar deur de locht
 goa ik ees met diej op diene vlocht
 woar as doe hen gees kan miej nich schealn
 k'wil der alleen later oaver noa vertealn
 Al vlögs oaver Afrika, dwes oaver t water
 en a krieg ik van t gesoes ok nen kater
 opgewn doo ik nich ik volg die wa doar
 zölfs in n duuster zee ik nog t spoar
 Bis dan meu van al dat weain, goa mer daal
 dan kom ik natuurlijk ok weer luk op verhaal
 nems doe dan weer op en wis geern verdan
 wil ik probeardn of ik t volhoaldn kan
 Wat krieg ik van boavnoet toch wat te zeen
 al soortn volk is doar oonder op de been
 De zun he'k zeen opkonn en ok weer oondergoan
 Nachts weai wiej deur, ok met volle moan
 Mear noe wi'k op t hoes an, oet is de toer
 want ze zitt oons noa met n grommelschoer
 Wat he'k völ zeen en k was nooit alleen

Mear woar de weend is bleawn, he'k nich zeen.

n EANDSTREEP

Miene veut zölt n weg betreadn
dee mienn Schepper hier hef legd
ginnen doping zal mienn gaank
harder an t loopn könn kriegn
en heb ik n eandstreep haalt
zal hop ik er één kloarstoan
um miej met mienn angst op te vangn
Maar ik weet dee weg is lang héél lang